

Međunarodna zajednica vrši uvid u rad BH banke

Predstavnici međunarodne zajednice su pod pokroviteljstvom OHR-a nedavno održali sastanak kako bi razgovarali o pitanjima koja se tiču rada BH banke. Nekoliko predstavnika međunarodne zajednice i fizičkih lica pokrenulo je parnične i krivične postupke protiv BH banke jer su milioni dolara koji su pohranjeni u Banci, uključujući sredstva za projekte rekonstrukcije i finansijska sredstva organa vlasti, bili preusmjeravani i nisu bili na raspolaganju deponentima i korisnicima, uključujući i građane Bosne i Hercegovine. U toku je istraga koju provode lokalni organi vlasti. Smatra se da je u pitanju iznos od najmanje 20 miliona DEM, iako se očekuje da će se taj iznos u bliskoj budućnosti znatno povećati.

OHR ovu situaciju smatra veoma ozbiljnom. Pouzdan i funkcionalan bankarski sistem je od suštinske važnosti za ekonomski razvoj zemlje. S obzirom da korupcija ne samo da košta društvo u smislu preusmjeravanja ili rasipanja finansijskih sredstava, nego i ugrožava legitimnost organa vlasti i podriva povjerenje javnosti u demokratiju, OHR poziva lokalne institucije za provođenje zakona na punu saradnju u istrazi o radu BH banke koja je u toku. OHR takođe poziva ostale pojedince ili firme koje imaju probleme sa BH bankom ili imaju saznanja o njenom radu da se oglase. Ovo se takođe odnosi i na bilo koju drugu banku.

Zamjenik Visokog predstavnika za ekonomska pitanja, Didier Fau, je rekao da će OHR nastaviti sa pažljivim praćenjem rada BH banke u nadi da sredstva koja nedostaju mogu biti vraćena i iskorištena za dalji ekonomski razvoj i rekonstrukciju Bosne i Hercegovine. Ukoliko ova sredstva ne budu vraćena, naglasio je Fau, to bi moglo imati veoma štetne posljedice za buduće napore vezane za rekonstrukciju zemlje.